

四庫全書

集部

欽定四庫全書

東萊詩集卷十

宋呂本中撰

離行在即事三首

昏日黃

缺裏經營

缺榻清者人長塵尾讓我短燈檠舊

友分窮達斯文鼎重輕邊聲授明主禮樂謝諸生

漂泊留旁郡煩人久厚顏強求微祿去未得故鄉還驛

騎隨朝發舟師語夜闌到家傳一夢歸

原缺
三字山

客况多堪笑歸舟靜擁衾轉喉常觸諱對面即論心

外物家無有園居念本深妻

原缺九字

次韻

舊傳榔實來瓊州

原缺二字

楚萍出中流雙

原缺三字

護缺送海

若亦恐貽神羞當時荔子寵妃子一日紅塵歸帝里棄
捐碩果人不食正音鏗鏘不入耳勿嗤魂礪老瓠壺中
含瓊鼎碧淋腴聖門貌取失子羽底事端可銘璠璵新
詩應欲泄感意更復誇談作真賜閱人如此慎勿欺

我缺與君論世事

閒居

風土猺人住依棲縣令尊
摘山春晚苦汲澗雨餘渾白
日供高枕生涯付小園時來攜白罐種藥兩三根

冬日雜詩

白日供多病青山且舊居
柴門臨水靜風葉舞霜餘老
練時情熟貧窮家計疎牆東端可望炙背飽翻書

失題

春景晴乃映寒江曉不波
雲山明客眼風露淨林柯紫

塞傳烽急黃池帶劍多蒼生好蘇息天意定如何

苦雨

雨添東澗連西澗雲斷前山起後山野水到門人去盡
昏煙迷樹鳥飛還江天日月渾無色客路風埃只強顏
舞石至今隨燕乳裁詩不復哭龍惺

題官使趙樞密獨往亭

謝公為時出四海正仰渠雅志在東山本末固不渝苻
堅百萬師一掃談笑餘今公抱長策豈止安石徒平生

獨往願結亭山一隅躋板上修竹已自勝巾車舉手謝
世人不與汝同途出佐明天子意欲雄萬夫行當復中
原即日還舊都豈容思昔隱更作深山居小人病無能
悞入承明廬朝夕投劾歸為公先掃除

申端應詩

避亂久去國遠游將抱孫氣埃到湖嶠愁嘆滿乾坤氣
力吾先老風流子獨存相逢能少駐重為倒餘尊

丁酉冬江上驚報

京路蕭條信不通
邊塵尚欲競南風
三年避地身多病
萬里攜孥艱屢空
天際每垂憂國淚
日邊誰了濟時功
宣王自是中興主
會見歎輿返故宮

高安道中有懷李彤

寒起溪邊蘆荻風霜林
病葉未全紅鴈隨雲落斜陽外
舟傍山行晚照中
極目閒愁愁欲絕
滿川離恨恨無窮
天涯更送親朋去
尊酒何時再得同

游陽山廣陵寺

沂流蕩漿到陽山寺在雲山縹紗間雨洗竹萌穿野岸
風吹榕葉落荒灣僧眠白日鐘聲靜花送青春鳥語閑
留醉嶺南無所恨不妨蠟屐恣躋攀

自陽山還連州

雨後輕裘寒尚侵杖藜終日共登臨水聲不似風聲急
山色何如草色深萬疊殘雲渡晚照千章古木發新陰
飄零未忍疎杯酌欲醉翻嫌酒滿斟

柳州開元寺夜雨

風雨翛翛似晚秋。鴉歸門掩伴僧幽。雲深不見千巖秀。
水漲初開萬壑流。鐘喚夢回空悵望。人傳書到竟沈浮。
面如田字非吾相。莫羨班超封列侯。

寄雲門山僧宗杲

隋堤河畔別支公。目斷霜天數去鴻。歲月峥嵘如許久。
江湖漂泊略相同。無窮煙草夕陽外。不盡雲山秋色中。
寄語只今能見憶。書來莫遣太匆匆。

懷從弟

折柳長亭今幾年一行作吏楚江邊音書頓逐歸鴻斷
消息時因過客傳五嶺風溫吹漳雨九疑雲濕卷愁烟
每吟春草池塘句尚想詩成夢惠連

柳州謁義帝陵廟

淅淅寒聲未落霜滿庭殘葉不勝黃牆頽雨帶煙悲象
爐冷風飄原缺二字香修慕尚應懷楚德入關猶恐快秦王
追思往事空垂淚無限傷心對夕陽

桂陽鹿頭山寺次壁間韻

霜風過雨不勝寒木落重重見遠山風捲沈浮橫浦外
鳥飛明滅夕陽間頰肩道永方南去趼足何時得北還
杖屨登臨共回首自憐五澤入荒蠻

同諸人再登鹿頭山再次前韻

梅梢風動勒花寒淡淡煙橫天際山顧我未能超物外
因君聊爾出雲間水聲不逐鐘聲歇林影常隨塔影還
異日同歸嵩少路即將詩卷話南蠻

聞岳侯破賀州賊次韓端卿韻

旌旗摩日甲生光
俘馘黃巾第幾缺
滅賊未須占鬪蟻
拓疆行且見神狼
燕然刻石功昭漢
太華題詩事後唐
從此兒童傳姓氏
風流何止繼韓康

永州法華寺西亭

西亭清淨冠南州
蠟屐聊為半日留
蒼莽輕_{二字}山麓
連卷雌霓落城頭
禽聲高下雲間木帆影參差天際舟
欲去凭欄一回首
晚風吹角不勝愁

廬陵舟行

雨過歸雲山更昏時間鷄犬鬧江村風歇船側收帆幅
浪拍堤平沒石痕憂患積年身益勸功名他日志空存
又看秋色飛紅葉故國歸期未可論

春晚

柳暗鶯啼春正妍斷勝分水灌平田花開花落樂番雨
山淡山明一抹烟突兀初晴雲外寺橫斜欲晚渡頭船
天涯因悵滄洲興何用區區苦自憐

宜章元日

東風初解凍桃李已經春避地逢鷄日傷時感雁臣湖
南馳賊騎江外踐邊塵憔悴成無用虛煩泪濕巾

久雨

宿雨何曾歇濃雲未放晴莓苔侵戶長蛙蚓入窓行鐘
送遠山響燈挑殘夜明芭蕉添客恨只伴缺簷聲

界步河亭

窮山擁翠染人愁亭下寒溪東北流寄語扁舟舟上客
為傳消息到筠州

塗中久雨乍晴

匝地濃雲散曉風輕霜挾冷下長空攢峯疊嶂來無盡
疑是舟行圖畫中

連州

再到連州却是家逢人不復嘆生涯尊前欲酒思鄉泪
羞見枝頭含笑花

寧遠道中

路轉寒松日欲斜野梅初吐兩三花溪流映石風吹碧

時有粼粼雨後砂

春晚

宴坐翛然萬慮忘從他風雨送春忙佛燈初上黃昏後

時炷郴州石乳香

湘江斑竹

湘江江上數重山山遠雲深縹渺間帝子不歸腸欲斷
竹梢空染淚痕斑

興安靈渠

淡日輕風細雨餘
陰陰溪柳映溪蒲
清流平岸舟行疾
野鳥時間聲自呼

野岸

淡日輕烟村徑斜
長風卷浪欲浮花
夜深隔岸漁舟過
螢火驚飛亂點沙

春晚即事

淡淡陰雲晝掩門
隔溪楊柳暗江村
落花狼藉飛紅雨

又是潺湲過一春

香山觀壁間詩因次其韻

抗志欲學仙自恨無仙骨去國將六年避地欠三窟禪房翳翠陰竹本可製笏誰持大君前指顧收回鶻

懷古


買臣負薪行且歌其妻羞縮悲蹉跎季子歸佩六相印骨肉歆羨緣金多人生窮達等幻滅貧賤何憂貴何悅爭如飢采首陽薇不慕臯夔希稷契貪功徇名世莫嗤施金曳紫同兒嬉一朝禍至幾發冢却思衣布丹徒時

丹徒風月依然好爾自升沈委荒草草長木拱荒烟寒此恨年年向誰道

近體詩二十韻寄秉之

憶昔春將暮分攜桂嶺邊落花依斷隄飛絮滿長川風急吹殘雨雲開放曉天山光如欲動草木不勝妍沽酒遙村市停驂近郭田臨行思欵曲已別更流連治邑煩游刃編氓荷息肩高牙久藏巧篤行衆推賢屢辱銀鈎覶頻更玉律遷故鄉迷藪澤回夢渺雲烟漂泊遙相望

窮愁祇自憐愛閑身益嬾多病氣仍孱故國因人問新
年底事傳祇應升斗戀聊結簿書緣諸老方推轂乘時
好著鞭提撕起憔悴騰踏動蜿蜒袖有平戎策囊無封
禪篇功名期萬里富貴屬千年范蠡終興越田單卒破
燕異時歸捆載乞我買隣錢



東萊詩集卷十

欽定四庫全書

集部

東萊詩集卷十一至十四

詳校官贊善臣朱紱

主事臣呂雲棟覆勘

總校官進士臣繆琪

校對官典簿臣劉景岳

謄錄監生臣龔焯遠

欽定四庫全書

東萊詩集卷十一

宋呂本中撰

食筈

窮鄉未寂寥五月當筈出近山新得雨此物晚亦發初
看數寸出意有千尺拔長條不成鞭乃以美見伐錦綳
罷駢頭玉指已不饑坐令藜藿口如受滌瀉滑連年江
海病未免魚蟹罰甘津到齒頰恐此或未察居閒快一
飽我已久斷殺更莫厭比隣時時聽羹戛

白鬚

不作韓城住虛為河朔行白鬚鑷更出知為阿誰生

宿劉固寺佛殿下即劉伶墳也

劉伶墳上土佛殿古崔嵬坐久野僧出天寒饑鴈來千年醉裏魄一鋘死前灰未盡先生意空留數字回

懷衛道中寄京師諸友三首

客舍冷如漿客夢甘如飴初無遠行念況有徂年悲平生好交游大半走路歧不如亭前月所到長相隨何時

脫身去共採西山芝有兒當似公尚能傳我詩

直莫如兩王清莫如兩方孫謝豈不美久滯尚書郎黎
子老歸國口今鬚眉蒼邵子住山雲欲出未肯忙高子
出林壑坐看天際翔

人誰不小康李趙常窘束窮閭爨溫火老未飽饘粥它
長未遽數此事已絕俗為人死不厭自奉一米足

河堤

平田接長河眼界起突兀今日茲堤行麥壠青已出客

行不知晚但感此節物新霜被西山久厭塵土沒坐懷
故人面於此見鬢鬚

寄濬州張撝

張卿留客酒如澑我欲從之病不能憶過公家更東望
斷崖高樹雪層層

田家樂

東家西家蠶上簇南村北村麥白熟小兒腰鎌日早歸
大兒去就田間宿斗酒相邀不為薄鄰翁相對且斟酌

聖主當陽億萬年年歲歲田家樂

梅

獨自不爭春都無一點塵忍將冰雪面所至媚游人

寄崔德符

江城昔還往者舊各能文暫別猶相憶雖忙亦見存好
詩能愈疾濁酒不勝渾它日經行地相尋夜叩門

還家

解鞍歇馬倦西游過眼文書且罷休薄酒向人殊有味

長年於世已無求常情未語溝中木俗眼能驚海上鷗
何處雲山不堪隱更誰辛苦訪菟裘

即事

晚菘早韭老不厭夜鯉晨鳧多見踈地僻難尋野僧飯
路長時枉故人車青山出沒塵埃裏白髮栽培疾病餘
更有腐儒窮事業夜牕殘燭一編書

讀易

春溫瘡疥繁衣敝蟣蝨細頹然坐南軒讀易初有味初

看象數殊忽此爻彖與紛紛者衆說行各半途滯大言
累千百雜說記一二坐令天人分復以小大計或強出
枝葉或自起旒贊孰能言語表能使意獨至空中本無
華眼病因有翳沈思忽有得是則入精義吾生晚聞道
歲月今少憇遺經日在眼似足了一世臨流濯垢衣尚
勿惜餘棄

復往大名三首

復往真無策茲行亦漫游塵埃走劇暑風雨占新秋便

欲還家去其誰為汝謀尚憐蘇季子虛敝黑貂裘

我老不自得每為飢所驅漫拋青箬笠空負白鬚鬚見

賊猶堪鬪逢人莫問途寰區足秀句山澤有腥儒

地濕頻經水田荒亦未收斷雲催雨過漲水沒橋流半

世想高卧十年悲遠游藜羹不用挾尚足誑飢喉

聞德道中

五更發荒村小憩草市北披衣度積水月落天正黑豆
苗半委地野父厭餕芻我馬則已饑泥土汚羈勒翻思

在家時一飯亦假貳小兒不解事笑語頗自得一官走
道路此責久未塞速行勿遲留有手須擊賊

陽翟道中

不為傷離別其如漸老何祇應從此去轉覺白鬚多

長葛道中遇周原仲

羸馬衝寒騎不駛積雪殘冰雜泥滓長葛縣中日落時
舉頭忽見周夫子下馬相看兩驚怪各喜南歸此身在
僧房夜語久不眠更摩楞腹償詩債子行四方尚謀食

我亦年來倦行役
樞下驛鷗世得知
海底珊瑚人未識
長安公卿富貴客
誰能日在子思側
洛陽年少未宜輕
看子重陳治安策

簡叔易益謙兄弟

秋來歸興復何如
李范聲名更羨渠
它日買田吾有策
兩家兄弟要鄰居

贈益謙兄弟

范郎走微官清固不絕俗
家常四壁立腹有萬卷讀邇

來所為文深若泉萬斛紆餘風過水宛轉蟲注木諸弟
況可人不但好眉目丹穴固出鳳藍田自宜玉行扛九
鼎重頓使一世伏聖朝急用士如子尚窮獨乃知德在
躬不必富潤屋我病拙文詞筆鈍如髮禿時逢子兄弟
未語心已足長空絕纖埃何處著鳬鷺朝來秋氣清佇
看飛鴻鵠

題蘆鴈扇

鴈下秋已晚江天風雨微寧為聚沙立不作傍雲飛

游西宮有感

種種不如意悠悠無復聽漫尋村路好似得片時醒水
隱城坳白山來樹杪青晚田收襟襖殘日度簪笏興入
山陰道詩如歷下亭荒原子胥廟千載想儀刑

送一書記果公作天寧化士

田家得米輸官倉一粒不得囊中藏天寧化士去如雨
此亦未易能低昂因官乞取民始病況復妄邀擅越敬
縱全不得半錢歸堂中聖僧應自知

京城圍閉之初天氣晴和軍士乘城不以為難也

因成四韻

戰馬侵城急官軍報捷頻民心皆欲鬪天意已如春
魏闕方佳氣王畿且戰塵不妨來往路經月絕行人

守城士

北風且莫雪一雪三日寒不念守城士歲晚衣裳單衣
單未為苦隔壕聞戰鼓陷陣須長槍防城要強弩砲來
大如席城頭且撐柱豈不知愛身君一作傾心報明主報

主此其時一死吾亦宜未敢望爵賞且

一作幸

今無事歸

寄語守城士此言君所知

聞軍士求戰甚力作詩勉之

今春敵來時軍士怖而走今冬敵來時決捨

一作射

揷兩

時憤然思出鬪不但要死守仰懷吾君仁未可釋重負
欲以占天心於馬卜長久暫勞何足道富貴要力取行
看偃干戈金印大如斗

丁未二月上旬四首

丞相憂宗及編氓恐禍延乾坤正反覆河洛擾戈鋌報
主悲無術傷時祗自憐遙知漢社稷別有中興年

厄運雖云極羣公莫自疑民心空有望天道本無知野
帳留黃屋青城挿皂旗燕雲舊耆老寧識漢官儀

羽檄從天下于今久未回如何半年內不見一人來周
室仍遭變宣王且遇災猶存九廟在咫尺得祈哀

主辱臣當死時危命亦輕謀吞豫讓炭肯結仲由纓灑
血瞻行殿傷心望敵營尚留儀衛否早晚復神京

兵亂寓小卷中作

城北殺人聲徹天
城南放火夜燒船
江河夢斷不得往
問君此住何因一作黃

緣竄身窮巷米如玉翁尋濕薪媼

爨粥明日開門雪到簷隅牆更聽鄰家哭

圍城中故人多避寇在鄰巷者雪晴往訪問之坐

語既久意亦暫適也

雪泥春既融曉月初破霧出門尋故人來往不數步共
談江南勝閑眼想去路松風被茅屋稻壠立白鶯行看

長圍解春水即可渡先當上鍾山次第入廬阜生平泉
石念久受塵土汙況今九死餘轉覺處事悞豫懷巖壑
裏所至陪杖屨可行君莫辭行李我已具

城中紀事

生平足艱窘可歎不可言兩遭重城閉再因羣盜奔今
茲所值遇我豈不與聞脫身保兒女恐辜明主恩傍徨
不忍去敢計生理存昨者城破日延燒東郭門中夜半
天赤所憂驚至尊是日雪正作疾風飄大雲十室九經

盜巨家多見焚至今馳道中但行塞馬羣翠華久不返
魏闕橫烟氣都人向天泣欲語聲復吞我病未即死爾
來春既分剥床供晨炊兩眼烟已昏豈無好少年可與
共殊勲志士或不恥有身期報君塞水須塞源伐木須
伐根子莫笑短拙荆蠻生伍員

讀易

江北江南公不歸人言公懶笑公痴閉門端坐讀周易
直過新春閑閑時

無題

敵國安知鼎重輕
禍胎元是漢公卿
襄陽耆舊唯龐老
受禪碑中無姓名

禍胎一作指縱

懷京師

北風作霜秋已寒
長江浪生船去難
客愁不斷若江水
朝思暮思在長安
長安城外高十丈
此地豈容塞馬傍
親見去年城破時
至今鍊馬黃河上
小臣位下才則拙
有謀未獻空惆悵
漢家宗廟有神靈
但語戈鋌莫狂蕩

讀司馬公集解大玄

京城半年圍道路三月病輕舟過江來所向復未定客
房夜涼冷氣體亦粗勝月穿窓罅白風入桐葉勁挑燈
讀太玄愛此頃刻靜物數極三甲此理本天命首贊則
分行故未及世應古歷漢則亡易實更三聖哀哉楊子
雲上與數子競雖云耗心力固自有捷徑後來司馬公
獨斂衆說盛錙銖判訛謬一宗蒙是正讀玄則知易此
實公所證如何少年子便欲獻譏評我老未知學讀此

知不稱掩卷坐搔首一洗肝肺淨明朝尋故人此語殊未竟

黃池西阻風

烏雲啣日日不出驟雨飄風吼三日扁舟寸步不得行
坐歎輕鷗如箭疾我行去家秋復冬故園回思春夢中
客愁茫茫若江水生計渺渺隨征鴻三年京城共憔悴
一杯此地難從容長溪卷浪雪花碎遠山橫空眉黛濃
故人別我上江去亦有書來喚同住破屋數間君有餘

太倉五升吾已具嚴霜未放鷹隼擊盤渦恐致蛟龍怒
片帆欲挂任萬師君但徐行莫深懼

景德北窓

雲橫樹陰濃雨漲溪水白故人喚我出已度蒸暑厄北
窓非不佳尚苦眼界窄小樓隱床後自與塵霧隔更憐
昭亭山相向有佳色君能具鷄黍客不厭須索我能知
子窮子亦能愛客人生要如是一舉乃諷百我病思遠
引未塞交友責便當約諸公歸耕作長策農無一錢贏

歲晚會有獲

昭亭廣教寺

故人喚我去

一作出

久雨值新晴草暗鼴鼠出山深鷓鴣

鳴齋厨半盂粥草具一杯羹尚肯頻來否門前春筍生

昨日之熱一首贈趙彥強

昨日之熱未為熱涼風頗隨團扇發今日之熱不可言
西山火炎塵障天高樓堅坐若燔炙常恐秋到無黃綠
與君相從今幾日欲度一日如長年憶昔京城值秋雨

人家邂逅得細語不愁歸舍少薪米且喜尊前好賓主
去年君自雲中歸隔巷尋君相勞苦是時強敵在城下
耳猶厭聽列營鼓豈知喪亂到江南同向宣城過殘暑
晚來一雨天遂涼便思約君來對床床前適有新酒熟
君醉可舞吾能狂醉中談天亦未妨回船吳中君勿忙

又贈

日日住疊嶂君能同此游黑雲纔映日白雨忽穿樓盜
賊何時定溪山且自幽炎蒸不須厭俄頃是新秋

題涇縣水西

江東住已厭又却一作度

過江西急雨投涇縣窮秋渡賞

溪稻田猶少水山路已多泥珍重高僧意求詩索自題

宿秋霜閣後方丈

秋霜閣後山屈蟠一作盤

行人衝泥脚未乾正是水西佳

絕處不辭風雨夜深寒

水西與李彥恢相從余將取旌德趨徽州彥恢先

歸旌德相候彭元任亦自太平縣來相送遇於

三溪驛遂同過旌德道中呈二子三首

水西投宿返秋霜起聽晨鐘厭一作促束裝尚惜故人輕

作別亂山深處過重陽

村場路僻多無酒野菊寒深亦未花底事中原歸不得
又扶衰病過天涯

白頭嬾入少年場二老追隨却味長預喜尊前聽清話
夜窓相對一爐香

休寧縣與汪致道諸公別後晚宿黟縣界魚亭驛

二首

竹密如雲不見天
好山無數簇溪田
祇應黟縣溪山勝
盡在魚亭驛舍前

故人相繼別
休寧山路籃輿睡復醒
所恨溪山正佳處
不能同我到魚亭

寄宣城故舊

宣城經歲無它事
尚喜交游不棄遺
疊嶂樓頭納涼處
宛陵堂下探梅時
君今尚要一囊粟
我去亦無三徑資

歸卧雲山更深處因書頻報故人知

祁門道中四首

去程歸雁兩悠悠行到荒山儘上頭試問中原何處是
只言東些是宣州

風落千山雨夜鳴時因歸夢識宣城欲知溪路行多少
已過徽州第五程

宣城人物未全衰四士風流世不一作未知別後畧無佳
語寄道中纔有數篇詩

詹郎逸氣今誰似
李令清言久不聞
獨立共傳摩詰後
隱居還見伯仁孫

桂林別珂首座二首

故人相望馬牛風
世事波濤混漾中
灘水東邊兩年住
往還纔有一珂公

北歸我已辨行纏
久約相從却未然
何處雲山堪著子
亂松回首嶺南天

答趙祖文陳夢授

嶺海畏深入江湖成遠游猶懷不活怖少為故人留苦
乏瓊琚報虛蒙札翰投因來問消息不必計沈淳

寄趙十一弟

親朋雖近懶追尋湖嶺歸來病至今寄語洪州趙從事
忍令無酒過冬深

東萊詩集卷十一

欽定四庫全書

東萊詩集卷十二

宋呂本中 撰

浮梁道中見小松數寸者極多然皆與蓬蒿雜出
不能即長也余傷之作詩寄范四弟

青松數寸根意出千丈外如何蓬蒿底此志久未遂朝
為牛羊踐莫受塵土翳雖云歲寒姿當此亦憔悴今年
雖小出尚與凡草類會須扶其根與作棟梁計大廈千
萬間匠石所睥睨世或未盡知慎勿傷汝志

自祁門至進賢路中懷舊二絕

雨歇路逾滑山空鳥不飛却思無事日騎馬踏泥歸
汴水夾榆柳今留胡馬蹤如何進賢路只是見青松

離洪州渡西江至翠微寺紫清宮

平明渡江西山西正崔嵬中流欲浪作細雨隨風回促
櫂赴前浦頗為風雨催寒沙引細路人家山半隈密雨
蔭脩竹久旱無莓苔晚入翠微寺諸峯環抱來其西洪
崖居百代所仰懷何年蛟龍怒更擊深山開懸瀑瀉洪

井噴噫藏風雷客行少休息暫此得徘徊城中二三老
咫尺不得陪豈無陵風翰邀致山中臺澗水清且寒可
以當餘杯獨來不敢久恐為神物猜

宿翠微寺

西山今夜雨不為故人留泥滑淹行李風聲欲送一作送晚
秋中原且多事吾黨敢無憂明日經由地江南更幾州

發翠微寺

古殿突兀風有聲粥魚欲打雞三鳴披衣起坐問行李

僕夫屢報天陰晴昨日路長頻雨阻今日東風得無苦
杉松連山寒欲動橘柚隔籬香半吐却憶京城無事時
人家打酒夜深歸醉裏不知妻子罵醒後肯顧兒啼饑
如今流落長江上所至盜賊猶旌旗已憐吳縣風俗僻
况復中原消息稀

送宋仲安往虔州

已流之水不可以復回已往之日不可以復來唯有野
外籬邊之黃菊年年歲歲見花開君如此菊不我厭處

處相逢同酒杯三年喪亂那可說君頭已白我齒缺高
才抑塞久未用坐守松檜凌霜雪君今又作章貢游我
猶少忍住筠州破屋不憂遭鬼瞰端坐或恐貽一作為神
羞求田問舍古所歎敢有遠去惟身謀為約嶺南三數
子明年乘興欲却東流

與仲安別後奉寄

出門送君時一步再徘徊雖云非遠別念與始謀乖欲
求連牆居故作千里來君今不我待欲跨洪溝回我獨

滯一方後會良未諧冬初風浪息蛟龍深蟄雷其如中原盜所至尚揚埃子行莫夷猶恐致狼虎猜敵人更遠適畏死投烟霾皇天久助順似不及吾儕獨以智力免寧有此理哉因書寄苦語亦以謝不才新春好天色指望烟氛開即當候歸艎取酒尋尊罍欣然得一笑便足禳千災豫章百里遠可以慰客懷須君起我病同上徐

孺臺

題筠州僧房

客來無語坐禪房共賞西窓一榻涼山路雨餘新筍出
江城春色雜花香烟厨已逐鐘聲遠樹色初隨塔影長
敢道閒居便安穩今年更欲下湖湘

離筠州

舊日閒居日無悰已倦游如今避地走不復為山留淮
甸初經夏江西復度秋今朝小亭望東北是筠州

題園悟與惇兄法語

果公昔踏塞馬塵城中草木凍不春甲士却立不敢問

其誰從之惇上人袖手歸來兩無語如今且向江南住
雲居老人費精神送向高安灘頭去

建城道中

建城南路入袁州怪石縱橫水亂流盡日衣冠在圖畫
百年心跡付林丘中原未作重歸計塞馬能令此地憂
浪跡江湖亦吾分運籌帷幄有留侯

行至醴陵寄故人

淺溪沙磧寒月白樹影踈我行天一角所至尚躊躇偶

逢勝絕地不異萬頃居臨流遂忘歸默坐數游魚寧知
塞馬闊江縣已丘墟故人亦未來一旬三寄書不必問
淺深但當膏子車新霜隨北風慘慘度重湖相尋近五
嶺慎勿厭長途

將至南嶽先寄演公禪師善公華嚴

塞馬揚塵烽燧作我行乃在天一角江西趼足過湖南
本赴郴陽故人約中途羣盜又蜂起所至往往為囊橐
遲回改路心自笑隱忍畏事人所薄不因此去渡湘水

更欲何時到南嶽山中況有二老人萬里同來且安樂
遙瞻見我應大笑白鬚黑面都如昨平生故舊幾人在
不早從公老丘壑自經喪亂可過從每一思之懷抱惡
請公更說因地初一解人間因慧縛

避寇南行

何處田園不是家儘扶衰病過天涯山村酒熟人人醉
客路春濃處處花敢道嶺南無甲馬側聞江左尚風沙
囊空甞倒君休笑亦有新詩伴齒牙

貞女峽

欲上貞女峽江險未敢行
豈是畏江險愧此貞女名時
經喪亂後世不聞堅貞烈士久喪節丈夫多敗盟寧聞
閨房秀感義不偷生窮荒禮法在尚此留佳聲時事有
通塞江流無濁清欲行勿憚險為君先濯纓

山水圖

君家茅屋低蓬蒿客來頗厭蛙蚓號何得有此山突兀
氣壓太華陵嵩高坐看遠澗受懸瀑似聽跬步鳴秋濤

槎牙老樹半枯死上倚絕壁緣飛猱我行日畏盜賊逼
敢厭瘴癘多腥臊偶逢坐穩懶歸去豁達眼界無纖毫
嶺南山水固多異恨無中州清淑氣對君圖障心悅然
便如似一作太華嵩高前君但對此能高眠當有好句令
君傳

連州陽山歸路三絕

蒼黃避地出連州邃谷深巖懶轉頭歸路始知山水好
少留村驛當閒游

稍離烟瘴近湘潭
疾病衰頰已不堪
兒女不知來避地
強言風物勝江南

嶺外從來不識春
青梅年後已嘗新
深山忽有殘花在
知與清明待北人

陽山道中遇大風雨暴寒有感

嶺南二月春已盡
百花委棄隨風吹
山前山後綠陰滿
已過中原初夏時
不知何氣忽乖沴一作庚
風雨夜作雷
乘之鞭笞宇宙敝
日月萬象倒錯藏
光輝巖傾澗絕水

府現捕搏虎豹擒蛟螭百圍老樹不須說忍凍欲壓摧
其枝崢嶸屋瓦走龍電如戰初合麾旌旗我行避地更
值此閉目但聽兒啼飢僕夫噤死者數輩牛馬懼不存
毛皮長途三日斷還徃况有鳥雀凌雲飛只今風塵暗
江路盜賊往往乘餘威良民雖在困須索四海萬里皆
瘡痍天公忍不一顧此反更震動窮荒為此方亦是神
所主我欲告訴心先疑明朝風定寒亦解收召魂魄尋
歸期澗毛自可薦筐筥試出苦語令神知

荅朱成伯見贈四首

三年轉東南足跡不得息新霜未壓瘴已畏賊馬迫

一作
逼

逼蒼黃度嶺去山路楓葉赤慨然念平生謬自有欣戚

交游半鬼錄在者費相憶朱卿早聞道一如見舊識新詩入要妙如射已破的我行囊貯空所至但四壁豈如投異縣忽枉和氏璧斯文得未喪豈不係人力出門仰高山此道如矢直

我適蒼梧野君來洞庭岸相逢迫

一作
逼

盜賊一笑未得

欵欣然望眉宇於我意自滿天寒道路長歲晚日晷短
僧房肯再來晴窓自妍暖

入林恐不遠入山恐不深城市有深遠不必在山林隋
珠不自寶豈在須淵沈斷弦得遺譜千載有知音

昔在中朝時每從賢俊游酒酣握手歡預懷今日憂兩
經嶺嶠春三度江湖秋朱卿抱奇節好語忽見收我無
濟世策君有活國謀相尋不相笑夜光猶暗投道喪師
友絕寧有民不偷風波極浩渺欲濟能無舟

連州行衙水閣望溪西諸山

嶠南氣常昏終日如霧隔我來已經時初不辨山色紛紛翳犯眼默默悸動魄今晨忽晴快如語見肝膈羣峯挿天青野水恣意白深窺木杪靜細數鳥道窄天心豈無意直欲慰北客纔經盜賊擾更脫瘴癘厄湖湘雖未定勢已初夏迫頗聞鐵騎遠不復更追索我歸當何時俗事累千百便擬衡山前今年飽新麥憂慮則未已四海方逼仄羣公獻納際或肯任此責先當肅區夏次用

及蠻貊豈容肆蹤蹣歲必有大獲天雖未悔禍世豈無

良策生一作主人苟未盡狐兔當有宅

贈歐陽處士

愛君年少便知足今君雖老更一作轉無欲閉門不出動

經時保此無窮清淨福黃衣弟子雜僧徒共守荒郊數
椽屋門前山水各有態君但疎籬對脩竹直如季路恥
有聞清似之推不言祿坐看世事雲變化一任兒曹手
反覆上皇龍飛三十春臨軒亦嘗思異人詔書屢下廣

搜索當時幾人能識真君時聲名動天子高臥不起空
逡巡謾收符籙養丹火一旦四海生風塵我來見君斛
嶺下識君無營真靜者殷勤愛我莫遽行尚肯相從結
茅舍時當喪亂足淹留豺狼恣橫空山夜它年有意過
匡廬一作
廬山更許淵明入蓮社

嶺外懷宣城舊游

中原未敢說歸期却憶宣城近別離疊嶂雨來如畫裏
敬亭秋入勝花時每憎卑濕尤多病苦愛風光屢有詩

今日衰頹那可說鬚鬚經瘴總成絲

余避地踰嶺寄書宣章孫氏賊去則盡失之感歎

有作

賊馬縱橫未說歸草間染上借餘威布帆此去應無恙
銀盜從來亦解飛世事口堪開口笑主人空有食言肥
自慚學道工夫少坐覺文書到眼稀

過嶺將至江華先寄朱成伯二首

自怪匆匆來往忙又攜兒女過湖湘敢言此地能安穩

且道新年離瘴鄉

嶺下微陰已自寒
早行山路覺衣單
故人見我應驚笑
疾病衰顏怯據鞍

端午日北還至斛嶺寄連州諸公

嶺上逢端午
隨家更北征
隔村聞賊鬪
通夕畏蛇行
獻病初辭瘴
衝泥却勝晴
猶憐昌歎酒
不與故人傾

山居素飯

豆苗可瀹瓠可羹
僧厨午飯蒸香粳
道人得此清淨供

下箸已勝肥羊烹平生為腹不為目偶逢一飽心自足
晚菘早韭舊所知五鼎百牢未為福

寺居夜起

山深夜無人竹密風露集長空新過雨尚覺星斗濕避
地走天涯如何免拘繫朝憂粟囊盡暮恐賊報急荒城
兵火後所至復未葺古寺半頽垣梟嘯鬼亦泣感事念
平生徘徊近墻立

寺居即事三首

瘴癘過庾伏庶幾其少瘳甘心忍殘暑指日是清秋汴
水他年別郴江此日留如何理歸夢只見嶺南州

因循過嶺表忽復到湖南氣力渾非舊情懷老不堪無
錢供痛飲因病廢清談尚有尋書僻窮搜未免貪

中原是何處敢道幾時回一夏無書讀經時畏賊來老
松猶偃蹇病鶴久摧頽莫怪論兵少吾今心已灰

贈夏庭別兄弟

披沙揀金勤乃見讀書何止須百遍如君心期已不凡

况有長兵可鏖戰一寒濕薪薰病目君但讀書聲徹屋僧房夜永燈火足更肯襍被來同宿

墨梅

嶺南十月春漸回妍暖先到前村梅問君何處得此妙
一枝冷艷隨霜開長江凜凜欲奔岸乃見好事移牆隈
初疑滲漉入瘴霧更欲寂寞埋烟煤微風不動暗香遠
淡月入戶空徘徊坐看粉黛化腐惡豈但桃李成輿臺
我行萬里厭窮獨疾病未已心先灰對此不覺三歎息

恐是轉側同南來異鄉久處少意緒破壁相對無根荄
古來寒士每如此一世埋沒隨蒿萊遁光藏德老不耀
肯與世俗相追陪輪囷離奇一作濩落
多見用犧尊青黃未為為木災含毫吮墨去顏色况自不必須穿裁歲窮路
遠莫惆悵此去保無蜂蝶猜

賀州聞席大光陳去非諸公將至作詩迎之一有次韻

字

五年避地走窮荒嶺海江湖半是鄉歡喜聞君俱趣召

衰頰如我合深藏曉寒已靜千山瘴宿霧先吞萬瓦霜
日日江頭望行李幾回驅馬度浮梁

送周靈運入閩浙

青松著塵市不辭塵土侵忍恥伴桃李不言歸故林交
游在貧賤始見平生心周侯客異縣屢蒙金玉音殷勤
不我厭自昔以至今使其少富貴未必能相尋豈謂子
誠然此風今則深子欲轉嶺海歲暮足愁陰路經盜賊
窟往往未就擒加鞭策駕馬欲行無滯淫故人散天涯

所在亦崎嶇相尋倘見及道我病難任

次韻錢遜叔見寄

異時文物漢庭臣公是中朝第一人忍使閒行犯山瘴
不令疾去掃邊塵情懷縱老元非病時運方隆只暫屯
顧我衰頹已無用尚煩新語訪沈淪

贈宗真上人

到處相逢是偶然渾江湖嶺屢經年贈君頌子君休笑
我已新來不問禪

東萊詩集卷十二

欽定四庫全書

東萊詩集卷十三

宋呂本中 撰

全州與解子中向伯恭相會

五年流落判西東
尚喜交游一再逢
但得低頭拜東野
不妨下卧見元龍
中原極目山千疊
往事傷心酒一鍾
如我支離久無用
敢因窮約廢相從
一作費

初至桂州二首

連年走避方所至
若郵傳未論道艱
阻先問米貴賤賊

勢來未已行役我已倦解鞍憩空館敢歎此異縣清泉
上短綆一洗塵垢面瘴癘非不深美醞良可戀

塵沙久衝突戎馬亦馳騖我行不得息終歲在道路敢
言更多事尚恐與時忤低頭訪殊俗何處可放步江流
下滄海日慘蛟鰐怒出門尋故人風雨已斷渡

桂林解后拜見仲古龍圖吉父學士別後得兩詩

書懷奉寄

所至艱危裏如何更別離只看山似戟自合鬢如絲湯

憇徒增疾文章不療飢端居溫餘論苦語自成詩

折老父高卧曾鄉仍倦游同為萬里走肯避數年留賊
幟江湖晚嵐烟嶺崎秋相逢得安穩乘興莫東流

比間二公

皆欲為廣
東之行

次韻吉父見寄新句

詞源久矣多岐路句法相傳共一家良賈深藏宜有待
大圭可寶在無瑕長江渺渺看秋注孤鶩悠悠伴落霞
感欲寄書商榷此嶺南不見雁行斜

桂州水西

隆隆而雷風乘之斷霓落日江東西江頭古寺頗岑寂
僧簷正與南山齊我來端坐已寒暑終日看山默無語
盜賊連村那敢問藜覓充腸未為苦早禾已旱心所知
正待山前一犁雨

斷橋

三月中作

橋斷客途少春深花已休閉門尤省事於世轉無求來
往只諸老相期非壯游欲知身所住同寓訾家洲時獨
范叔

器李平裝夢覲
數相過從也

贈嶺東陳秀才

風吹賀江浪如雪浮梁左右行人絕病夫坐穩懶出行
破屋只愁吹瓦裂東縣陳卿忽叩門笑語歡然相暖熱
怪我長貧走道路所至不安寧有說鄰州賊報又警急
欲泛扁舟窮百粵如君長才亦未用獨守區區負奇節
未能俯首效兒輩肯便出門探虎穴馬羣時致千里足
烈士寧無一時傑我復何人敢言事一世摧頽甘短拙

幸君無事時一過喜聽高談健其決漳癘參差畏久留
歲月崢嶸惜輕別

衡州逢解子中別後奉寄

我來筠水陽君亦發章貢相逢瀟湘門及此兵未動卧
聞羽書馳起見行者衆匆匆不及欵尚辱苦語送慨然
念平生相從已如夢交游半生死所至多驛縫我衰學
不及一作入君亦老未用熟知一世中有此九鼎重子贊
則君子閔子言必中師門未遽絕斯文實天奉別離又

幾日坐想發狐諷衡州逼南嶽湘水寒不凍頗傳江西
擾盜賊已放縱往從田蘇游此樂不得共

范縣丞惠雙鷄

羸病不能除肉味每逢齋鉢愧餘生雙鷄未可為公饍
留與山僧報五更

王撫幹失去毛裘

王郎隨身一駝裘偷兒遽作壑失舟春初未免霜露迫
一作逼歲晚可無遷徙憂客房夜坐薪當燭不怕近江風

裂屋馬平編戶更艱難君行莫忘民號寒

四十二第將還賓州相遇夜話

兵戈久未歇所至轉搶攘萬里逢吾第三年走瘴鄉春
風入古寺夜雨暗浮梁尚肯留連否僧廬可對床

呈折仲古四首

市酒酸甜久絕沾濕薪薰眼坐僧廬尚憐諸老無機一

作

幾事不待愁人折簡呼

龍閣老翁流落久如今辛苦去朝天向來嶺海經行地

分付蠻溪著釣舟

已無厚祿故人書尚有相尋長者車所至紛然兵火裏
不知從此更何如

疾病侵凌百不能只今全是住庵僧謝安肯為蒼生起
早與吾君了中興

次韻王撫幹見惠

新春忽忽到庭除短褐經一作輕寒病却蘇漫以詩書教
兒子嬾將薪水倩童奴天涯每覺人情薄眼界何知風

景殊萬里相逢君莫歎好山無數簇城隅

次韻王漕見贈并寄曾吉父二首

前賢去則遠今代不無人小出已無敵深藏恐未仁兩
章知思苦一語見情親徑欲忘衰病知公筆有神

曾子住南國端居無所思逃禪不用酒投筆謾成詩敏
捷忘千慮縱橫又一奇子中有住處莫待折肱醫

次韻折仲古見贈

未有絲毫補縣官幾年流轉但求安江湖自稱嵇康嬾

故舊空嗟范叔寒。顧我初無食肉相。喜公復著侍臣冠。
新詩不忘東山一作平戎志。敢作尋常禁近看。

再用前韻奉和

自昔支離畏一作怕作官。只今猶望一枝安。飽知時態病良已。心喜故人盟。未寒所至軍書銷。日月幾回戎馬失衣冠。公歸定有安邊策。不學愚夫靜處看。

夜坐有感

五更月落雞未鳴。小爐殘火猶晶熒。道人強起理衰疾。

不聞松聲聞雨聲，跏趺坐穩百念去。豈有宿夢令神驚，

平生于世萬事嬾，況復今茲飽憂患。中原北望四千里，

三年不見南飛雁，著身天涯未為遠。所至風沙莫深歎，

時寒但一作可趁僧房，火日暖可一作但赴鄰家飯。

嶺南無瘴便可老，江頭有酒猶堪喚。嗟哉甯子不自休，辛苦飯

牛過夜半

送密上人歸江西

輕舟君先行，羸馬我已往。湖山已在望，南嶽行可仰。不

憂盜賊繁漸喜草木長密也負奇氣少已離塵網飽參
諸方禪所至被稱賞獨留未後旬未肯休吾黨經尋卓
錐地更足以自養囊空脚頗健體儉心甚廣喜談江西
勝妙處猶一作如指掌未見頻寄書悠然發遐想

送常子正赴召二首

屬一作昔者聞居久今來促召頻但能消黨論便足掃風
塵衆水同歸海殊塗必問津如何徒貴耳敢謂漢一作世

無人

疾病老逾劇交親窮轉疎惟公不改舊怪我未安居日
月干戈裏江山瘴癘餘南行見李白亦莫問何如

送頌山上人游南華

三浙三衢未說歸且從嶺路訪曹溪盧公若問南來事
但道江湖盡鼓鼙

頌山送譚師直歸湖南

人事日翻覆昔同今不然于心苟有用與世自無緣剩
結官田社飽參雲蓋禪已勝高鳥盡徒泛五湖船

送能化主還法輪

嶺外三年避賊忙 法輪元不下禪床
君歸却說嶺南事 瘡暑著作時君自涼

送夏少曾兄弟

處處人家避賊忙 數因行李問舟航
江橫晚照鳬鷗亂 春到空山草木香
我未有緣離嶺嶠 君今決策下湖湘
定知此去添貧病 不及相從氣味長

本中將為江浙之行念當與夢覲遠別感歎傷懷

因成長句奉呈

客行已無聊况此憂慮集頽然念遠役未見勇可習虛
庭覺氣潤遠視螢火濕故人不我厭踏雨相勞揖朝餐
共飢飽夜語同坐立問我去此邦何用如此急干戈與
瘴癘未見可出入何殊知二五而不知有十俛首謝勤
意此非愚所及天涯重離別所至方業岌感懷平生舊
忽效兒女泣風沙蔽中原道路滿荆棘世事古則然臨
分莫於邑

贈日者張直夫

因循避世不求名潦倒江湖過一生賈誼定能尋季主
子雲先已識君平獨行市肆口無語嬾踏權門身自輕
看覩生塵只堅坐世間一作似君寧有不平鳴

永州西亭

舊聞西亭勝獨盛湘湖間山秀水亦好千里在憑欄今
來乃不然眼境故未寬環城但濁水滿目唯荒山如何
柳司馬肯為此解顏始知憂慮久方覺所遇安我從避

地來山水亦

一作日

飫觀初不厭嶺嶠

況敢

復作嫌荆蠻

徘徊念昔人亦作故

意看所慚二三子來不倦躋攀

開軒納微涼共享一日閑說詩到雅頌論文參詰盤快若

箭破的圓如坂下丸此樂固可樂此盟安得寒天暑畏

道路時危安

一作多

阻難相逢得少歇莫問何時還何須

待杯酒始盡平生歡

浯溪

五月行人汗如雨意緒昏昏離塵土浯溪一見中興碑

便有清風濯煩暑中興之業誠艱難敢作漢武周宣看
紛然大歷上元間文恬武嬉主則辱但知追咎一祿山
袖手不作如旁觀天亦未使庸夫干故生李郭在人間
一時節士張許顏其誰不知唐已安道州落筆風雨寒
魯公大書鎮百蠻訶叱水怪摧神姦有臣若此亡所歎
而不能使君心還我來轉嶺逾千盤對此凜然清肺肝
想見羣小遭譏彈爾曹何心猶誕謾至今怒髮常衝冠

送元上人歸木山

長囂而寂方作而息如射破的初不以力子居深山又處絕頂避囂不作二事俱屏往來臨川道里且千一見我喜如舊交然我欲屬子重于發言子請則堅之子之賢遍尋諸方不主先入唯是之從何拘何執惟昔善財我曹之師其心廣大誰能間之山高海深德則不孤不深不高培塿潢污奚必深山惟靜之守求寂念息以閱永久

贈一上人

偶從嶺嶠轉江東得向踈山見一公所至

一作疇昔

共游常

草草爾來相遇更匆匆晁郎埋骨虛無裏壁老收聲

一作

身蒼莽

一作莽蒼

中二十餘年往還事半隨秋雁落寒空

贈珪公果公四首

北歸住江西塵事日窘束兩公時踵門高誼已絕俗空
房擁殘火更許相就宿不嫌寒無氊肯厭飯脫粟

果公玉壺冰所至自清淨珪公出林鶴肯與雞鴉競吾
窮得兩公頗覺意氣盛未能出艱危猶足起衰病

果固昔所熟珪亦舊聞名江西一聚首遂寬南去程掃除文字習追尋香火盟期君向此道隱若一長城

堂頭老居士我識蓋自早聲名從少年閉戶今却掃公能為少留尚可慰枯槁欲知主人賢但看此二老

次韻錢遜叔清江圖後二首

公但一室堅坐我方萬里生還共作十年清夢同尋五嶺名山

作清江三兩曲勝大廈千萬間若保此中安坐不必中

原遞還

次韻錢遜叔獨鶴圖三首

長頸竦身嬾不前此寧有望更騰騫懿公愛爾非無意
要壓曹人三百軒

粉墨半銷翎翅短正如衰髮不勝簪可憐少保功名悞
寫此凌雲意不堪

眼明見此出籠鶴似我北歸辭瘴嵐慎勿一作莫低頭待

收養人間欣戚盡朝三

次韻錢遜叔畫圖

西風著人塵滿襟
江山縱近難追尋
當年寫此數幅妙
坐使几案頻登臨
斷雲黯慘出古寺
遠岸杳靄連荒岑
漁舟蕩漾江路晚
烟雨濛籠山店陰
已知落筆一作氣

筆下氣

象古一任世間消息沈
最憐霜榦倚長石
不待歲久成枯林
知公此中興不淺
此畫故能留意深
只今燕坐一室裏
尚費從來長短吟
詩成掩卷坐秋晚
一唱三嘆求遺音

送一上人

我齒久已搖君髮日向白相逢不相笑共被老境迫周
旋三十年近歲多間隔伊昔無事時日夕望顏色此道
要琢磨苦語費思索不能如宿心每負朋友責別我寧
陵縣隨我昭德宅所期無二三可恨已千百交游大半
死況值兵火厄舉首望八荒無乃天地窄涼風吹秋深
江湖動行客誰能于此時際一作出語見肝膈邊塵蔽中
原盜賊暗阡陌公其無遽行待我有良策

錢遜叔諸公賦石鼓文請同作

江頭羽書相續來
城中草木凍不開
腐儒坐視了無策
但守寒爐吹死灰
我公送我石鼓文
令我琢句要春回
簸蕩風雲走

一作寫

蛟蜃百虫久蟄聞
驚雷錢公自是力

扛鼎持此浮游轉
湖嶺漢碑秦篆已
么麼況復鍾王敢
馳騁後來頗供兒
女弄神物有知當遠屏石鼓之文
公所知正是周室中興時
庶幾我皇亦如此
一掃攬搶隨
風一作灰飛石鼓之文尚可讀
小臣願繼車攻詩

和邢子堅韻

萬里重歸舊禿翁笑談聊復興君同鷓鴣所願一枝足
鼈鼠從來一作真成五技窮短髮自梳渾欲白殘爐因客尚
能紅正須混迹師元亮未忍低頭學敬通

東萊詩集卷十三

欽定四庫全書

東萊詩集卷十四

宋呂本中 撰

戲呈東林雲間二老

幾年湖嶺費追尋尚喜歸來聽足音禦虎已知吾有命
問禪方見子無心風塵黯淡病如昨歲月峥嵘窮至今
猶覺相逢有餘恨老益盛酒不同斟余常以謂可與共飲者至難得也二
公超然之韻可與共飲也而不得共飲為可痛惜曉此語者許伊具一隻眼

佛曰縱步相尋索歸甚苦戲成絕句

相逢不用苦相催只一作直到更深月上回莫怪室空無

侍者夜窓相對有寒梅

東林珪雲門果將如雪峯因成長韻奉送

東風被澤國君有千里行送君不能遠宿昔春水生塞
馬馳中原旁淮多賊城即今江南岸盜賊猶縱橫頗聞
閩粵靜農民方及耕雪峯佳主人況欲屣履迎兩公與
談道正欲平其衡但見演若頭自然心地明云何未覽
鏡便欲其流清君行可語此勿憂兒女驚鄙夫牙齒缺

苦遭塵事櫻七年憂奔走一飽費經營野鶴出籠飛尚
須完翅翎今者與君別故鄉他日情新詩見萬一庶用
託同盟

贈童堯詢蔡楠謝敏行

七年避風塵無復少年事適從嶺外歸眼病不識字尚
幸戎馬間得見此數士蔡童南城傑所養蓋有自兩謝
名家子學已前作似相逢眼暫明已足慰遲暮如何捨
我去使一作全我起千慮江深羽檄繁況此日月驚猶餘

大謝留與我相近住風霜渺墟落泥土暗道路得無經
一作驚此別各復走他處期君則甚遠苦一作告語不厭屢
微言恐遂絕其誰與一作知調護要當發憤求不欲一作未可
僥倖遇聖門極坦平渠自有回互河清倘有期未死或
可俟

和范仲熊舜元游橘園見梅

橘林經一作因雨未全衰歸路人家已見梅風物粗知一作一作
如江左勝瘴烟新離嶺南來筆頭有眼方知妙句裏忘

言始絕埃但得一寒無事過與公還往勝銜杯

荅錢遜叔 一本有訪戴圖三字

北風吹霜夜如雪江城草木凍欲折病夫袖手無所為
一坐臨川已三月忽蒙妙句起衰憊頓覺和氣生毛髮
公能忘機我亦倦不待曼殊見摩詰畫圖是非久未解
況保長年不磨滅請公置畫莫多求要與時人除愛渴

與錢遜叔飲酒分韻得鳥字

客游等浮一作薄萍歲事如過鳥逢公得一笑不厭古寺

悄雨聲喧客耳燭影吹半裊宿醒未及解更覺惡韻擾時方足艱虞身未識要妙如何一杯酒便出萬物一作事

表別公願一言使我意易了

贈別范一哥

相送不嫌遠詰朝當語離文詞知子進道路覺吾衰力疾終無補徐行敢厭遲臨分更回首苦語漫成詩

送謙上人回建州三首

子來不憚千里遠我病可無終歲憂相見匆匆又相別

主人無恨一作厭
客無求

平生苦節胡元仲老大多才劉致中為我殷勤問消息
十年堅坐想高風

遙山渡口晚猶寒道路奔波未許閒頗恨獨來不同賞
竹輿穿雨上踈山

與范益謙炳文叔儀步月

一云與諸
范步月

歲月忽已過羈窮非獨今稻塍分白水月影上清陰畎
畝平生事江湖他日心相遇無百步猶覺費追尋

陸庭元紹意齋

聖人母意物我同大賢庶幾其屢空今君胡為用此意
乃欲酬酢萬化參天工客來無窮君不厭所施不同皆
有驗風寒燥濕互相代一理驅馳無頓漸衡門端一作宴

坐一事無衆皆刼刦君有餘見賢不避忘其軀肯與俗
子急錙銖知君此意久已絕為爾病生吾有說倚儲百
藥待百病任爾紛紛強分別君但守此心如錢徧與衆
生除衆熱是則名為無意訣剩放南山

一作憲

著秋月

病中口占示益謙四弟

病來全少靜工夫藥裏關心計已迂縱使君來亦無語
更無餘法待文殊

竹夫人

與君宿昔尚同床正坐西風一夜涼便學短檠牆角棄
不如團扇箇中藏人情易變乃如此世事多虞只自傷
却笑班姬與陳后一生辛苦望專房

郊居

紛紛俗駕不容攀尚喜郊居絕往還野寺並冬終日雨
客房無事一秋閒平生談說舌猶在病起彫疎鬍已斑
始悟莊周太多事處夫才與不才間

送楊蒙秀才往樂平

我有閩粵役君成江浙行窮途一回首歲晚倍傷情佳
氣占行在烟氛滿列營如何抱奇策不一請長纓

寄題暨尚卿雙蓮亭

異畝同穎久未出雙船共抵復何物今君何以得此花

和氣所致無他術雙蓮共蒂中連理相映同心出秋水
秋水池塘曉自涼雙蓮中含風露香飛燕姊妹一作第

不

相妬並騁逸艷來昭陽自然容質見高韻不必粉黛呈

新粧君家孝友聞近

一作郡

縣故使奇祥眼中見一洗東

南戰鬪塵小人知之亦革面我來崎嶇山嶺間忽聞雙
蓮能解顏請君更畫作圖看毋使惡木譏彫殘

簡范信中鈐轄三首

交游契分如君少湖嶺溪山似此稀夾路梅花三十里

故人雖病莫先歸

海角相逢又一奇更憐朋舊得追隨滿堂舉酒話疇昔
疑是中原無事時

他日曹南十日雪訪君尋酒不能回梅花此日懷安路
更有清詩入座來

次韻李仲輔僉判

曉晴破雨却寒天海上風光絕可憐更欲陪公了春事
不須乘醉始逃禪

西施舌

海上凡魚不識名百千生一作性命一杯羹無端更號西施舌重與兒曹起妄情

和秦楚材直閣韻

鐵馬南來議擊毬忽聞羌虜斬楊首

敵中欲謀舉事則先為擊毬之會漢

宣帝時羌虜斬首惡楊王首等二人首降服

一年春事兵氛退萬國歡聲佳

氣浮臺閣如君須強起林泉容我且歸休漢家基業無

窮盡早晚留侯與運籌

和展鉢詩

紛紛未了向來因，同在浮沤寓此身。
顧我久拏庵外事，知公曾是箇中人。
齋孟已厭五鼎食，詩卷初無一點塵。
今代王孫能樂此，中興祥瑞不須麟。
一作鱗

鼓山

危欄不知高下瞰，萬里路滄海近咫尺。
大舶不敢度風雲，遞舒卷川原更回互。
如何此道場乃倚絕壁住得非，化人居無乃仙聖。
寓斷崖石倒懸絕壁水暗聚我行天。

一涯勝處時一遇衰病

一作頤

九死餘已乏濟勝具登臨

茲

一作茲
游欲

忘返尚覺慰遲暮山林興膏壤未到已心悟

王傳巖起樂齋

人生各有樂所樂故不同吹竽與擊缶同在可樂中孰能識至樂不計窮與通顏子在陋巷肯憂家屢空朝從聖師游暮歸無近功忽然若有合此樂固無窮當時二三子因之開蔽蒙君生百世下久已聞其風端居有遐想客至聊從容四壁倚蓬蒿萬卷蟠心胷回視世所求

天道迷西東此樂既不遠欲往吾其從

寄范四弟十弟

俗事紛紛如亂麻又扶衰病轉天涯文章老矣思吾弟
頭角嶄然勝外家異味幾回占食指遠書終夕望燈花
何時更住城南寺共聽春池兩部蛙

春日紀事寄内外諸第三首

水生溪漲欲容舠疾病因循厭作勞莫道深居便無事
午窻疴癢費爬搔

自聞賊報離揚州
準擬春來共出游
所恨溪山最佳處
不容老子便歸休

長閒漸化讀書癖
遠道聊因避地行
安得薄田了饅粥
便相依倚過平生

寄諸弟

九年任奔走一飽費經營
此日窮居意他鄉獨往情相
憂只有病所至但論兵尚喜吾
諸弟形模遠勝兄

游鳳池

遠近諸山翠作堆鳳池北望更崔嵬青松夾路攬天去
白鳥翻雲旁海來喜有故人同出郭屬因衰病阻銜盃
猶憐不赴對牀約獨上籃輿日暮回

題孫子紹所藏王摩詰渡水羅漢

問渠褰裳欲何往彷徨徙倚滄波上至人入水固不濡
何以有此恐怖狀我知摩詰意未真欲以筆端調世人
此水此渡俱非實摩詰亦未嘗下筆孫郎寶藏今幾年
往來周旋兵火間世人險阻更百難彼渡水者安如山

請君但作如此觀莫更思維尋筆端

送筭與何晉之

年來念念欲深藏頗覺看書氣味長莫怪囊空無一物
猶能分筭送何郎

次韻李伯紀園亭

昔日翹翔雨露邊已將勲業畫凌烟便尋松菊同元亮
不訪丹砂學稚川可但海山勝綠野頗知風物似平泉
小園只在虛窓外佳處常當几杖前

本無俗事可裝懷樂圃花欄應手栽乘興聊陪野僧坐
賞心時許故人來頓令此地成三絕不為它鄉賦七哀
鐘鼎山林兩無礙豫章須是棟梁材

送林之奇少穎秀才往行朝

我為福堂游破屋占城市城中幾萬戶所識一林子翁
然衆木中見此真杞梓未為棟梁具且映風日美予之
於為學其志蓋未已上欲窮經書下考百代史發而為
文詞一一當俊偉夫豈效鄙夫念彼不念此今來赴行

朝學已優則仕窮通決有命所願求諸已聖賢有明訓
不在於青紫丈夫出事君邪正從此始

鄭昂用岑參太白胡僧歌韻作楞伽室老人歌寄
果老

楞伽室中絕皂白去天何止三百尺只今更住最高峯
齋無木魚粥無鐘已將虎兕等蠻蟻更許蛙蚓同蛟龍
聞道說禪通一線為爾不識楞伽面一生強項我所知
氣壓霜皮四十圍世人未辨此真偽敢向楞伽論是非

諸公固是舊所適鄭髯從之新有得欲將此意向楞伽
但道鵠鳥同一色

何止一作未到

贈王周士諸公

空房夜氣清落月傍簷明念我平生友相望隔荒城我
老未厭書破窓猶短檠君亦不奈一作得閒默坐數殘更
共結香火社同尋文字盟王子潮州來一笑冠欹傾午
飯展僧鉢村醪傾客瓶相逢但談道絕口不論兵未免
俗眼笑屢遭時輩輕一作驚人生各有趣小大俱有程譬言

彼澗底松難伴池中萍雲鵬與斥鶴已矣兩忘情一洗
瘴海耳此言君可聽

殘更一
作長更

贈范信中

異時攜客醉公家蠟燼堆盤酒過花萬里溪山隔春事
十年風景困風沙鄭莊好客渾如昨何遜能詩老更佳
但得尊前添一笑莫勿一作言漂泊在天涯

會稽石道叟教授南劖兵火搶攘之餘興治郡學
尺椽片瓦皆其所自經營也未朞月而學成遠

近賴之又祠前輩賢者以風勵多士使游其間
者望之而心化由是而入堯舜之道不難也古
之教者蓋多術矣五帝憲三王有乞言憲賢于
乞言也道叟知之矣呂本中為作詩叙本末云
聖遠道則微世久學欲絕區區續微言未易勝邪說石
侯東南秀賜此心欲折分教南劍州意在補亡缺歛令
兵火後復見俎豆設廟貌甚尊嚴上下有區別先生默
無語風化動閩粵斯文自明白如仰見日月坐令穿鑿

悞不待湯沃雪不知旁祠誰今代古豪傑孰能與之齊
共此歲寒節入門日在望未返意已竭由來正心術不
在費頰舌乃知薰陶功自與聞見別曾魯頑不愚亦豈
有優劣此理倘可求萬古同一轍

前輩謂陳了翁也

寄計議弟張彥實錢元成夏庭列

遠書來稍稀叔也經月病微官自拘束歸興復未定誰
能相勞苦頗亦奉朝請安身子有道可保在不競寧聞
鄭子真肯待當世聘張錢平生歡未貴渠有命舊交餘

此人豈減昔日盛夏郎來幾時間學當轉勝高風隕寒梧相助筆鋒勁同歸定何日不必有三徑相從說平生保此一室靜

寄內


一作家

弟并示仲輔諸公

江浙音書絕不聞每逢時節嘆離羣一秋多病常嫌客
短日無聊只閉門淺學未容窺易象舊書聊復誦玄文
莫言耆舊彫零盡海內交游尚數君

簡范信中

詩人例窮君不然畫堂繡戶羅嬋娟當時乘醉出三峽
至今妙句留西川底事新來多退縮梅花滿眼看未熟
便期載酒約來冬似要惡詩相抵觸曉來寒凜似中原
君忍閉門清晝眠我病猶能相追逐知君心期終不俗
但攜二妙喚諸公一醉落花吾亦足



東萊詩集卷十四

欽定四庫全書

集部

東萊詩集卷十五至十八

詳校官贊善臣朱紱

主事臣呂雲林覆勘

總校官進士臣梁琪

校對官典簿臣劉景岳

僕錄監生臣葉寧光

欽定四庫全書

東萊詩集卷十五

宋呂本中撰

再簡范信中益謙呈張仲宗

昨日之游樂不樂主人愛客亦

一作客

不惡梅花遠近遍

川谷雨練

一作冰

風揀未全落明日之游復如何城南城

北梅更多對酒我不飲把殘君當歌酒肉雖勤主人費

且幸吾黨頻相過梅花縱落君莫歎與君同住海南岬

花開花落都幾時君醉我醒人得知相逢一笑俱有詩

如何不飲令君嗤

寄晁恭道鄭德成二漕

二年住閩中不識建溪茶處處得殘杯顧未愜齒牙飢
腸擁滯氣病眼增昏花故人持節來憐我病有加會當
餉絕品不但分新芽蒼壁月墮曉寶胯金披沙一洗肝
肺淨兀坐如還家陰雨又不解天氣復未佳持詩寄兩
公請為交舊時便續北苑譜即日定等差

連得夏三十一吳兄弟范十五仲容趙十七穎達

書相與甚勤作詩寄之

閒居病亦侵世務每絕念猶憐二三子從我久未厭書來不改昨意苦辭亦瞻問我來何時期我早會面我行但謀食欲去復未便要當相就居同止山水縣讀我所傳書亦足滿素願開卷忽有得如飲醇酒釀吾聞古志士學也蓋有漸欲升夫子堂不摘屈宋艷倒籬望青天豈必在窺覲他時倘從容此語子可驗

送錢子虛撫幹往洪州赴新任二首

君不求時用居然如病夫經過閱歲月相伴走江湖白
玉終無玷寒松保不枯同官多勝士總為致區區
老矣吾無用歸歟子未宜端能出奇策略為濟斯時悶
有書遮眼閒須笏挂頤西山有爽氣當報故人知

題晁恭道善境界圖

疇昔相從三十年如今休去不逃禪知君參見法輪老
始悟蒼蒼便是天

境界本來無善惡人間何處有新圖欲知箇裏真消息

臘月寒松永不枯

問乾元珪老

問訊乾元老江頭幾日回還應艤船待不作御風來漫有經旬別頻思一笑開庭前荔子熟尚要著詩催

贈楊紹祖

城東往還者相近得楊卿處世如無事為官不近名匣藏防身劍案有讀書檠此外唯尊酒時時喚客傾

謝宇文漳州送茶

暑氣侵人病逾劇虛堂坐調出入息漳州太守送茶來
王圭小鳳俱無敵太守憐我病無語故遣此茶相勞苦
千金一餅君未許百金一盞如潑乳其它鬪芽未足數
下視紛紛等塵土病夫未飲病先愈坐覺爽氣生肺腑
城中車馬鬧如雨更有樂善如君否

夏日

暑雨遂經月客來困稍疎閉門觀易象反復看何如妙
處元非畫微言不在書故山初未遠舉首是吾廬

過劉忠顯公鄉縣作

疾風知勁草世亂識忠臣自古有此語今代豈無人劉
公生東南節義邁等倫時危出一死以捍戰馬塵遂令
天下人稍知吾道尊至今生氣在凜凜凌層雲我行崇
安野瞻望彼高墳流澤既未遠有子賢而文會當廣德
業早為建殊勲此意苟不泯楚人生伍員

夏日深居二首

忽忽車馬未言還因病深居未得閒更為故人留一夏

稍移行李過東山

故人多住城東寺還許相過結淨緣海冠求降弟子熟
是中風月可忘年

乾元副寺欲還雲門

子有四方志雲門尋舊游溪山往時夢江海一番秋物
態隨高下生涯任去留閒將問庵主如此是禪不

慶堯侍者以詩相贈偶成絕句謝之

滿城車馬雜塵埃所至如雲撥不開只有西禪堯侍者

肯衝劇暑送詩來

渴雨簡張仲宗二首

強讀文書不補饑
只今一飽尚難期
薄雲未肯蘇禾稼
細雨纔堪濕荔枝

雨濕平林松桂香
斷雲冉冉拂疎篁
江山故自可人意
從此歸休策最長

謝楊紹祖惠玉友

我來閩中居中熱久
斷酒端居苦無事
神氣思內守故

人憐我病小缸送玉友極知此不凡嶺海見未有感君意則重納約况自牖欣然洗盞嘗不待捧素手空杯貯玉色一洗市沽醜坐令百疾去敢復望升斗從令破酒戒可以入道不

與李似宗別後奉寄

昔者相遇今幾時心期雖在事多疑滯留江海君先病悵望雲山我欲歸老境猶存作詩苦故人多有食言肥漢陰老父如無事肯復逢人論是非

作雨不成旱暑愈甚未能就道

三日陰風雨不成坐嫌衝暑作宵征敢因貧故累公子
尚欲閒時尋友生兵甲未休心已醉詩書頗費眼猶明
便須準擬庵居用拄杖繩床折脚鑪

聞鵲

一夏病如此他鄉閒未回疎簷聞鵲喜知有遠書來

荔子

南征未厭苦關山荔子今年已厭餐時有野僧來獻供

每煩佳士約同樂
門前炎暑三伏旱
坐上冰霜六月寒
他日一尊須念此
中州傳買半梨乾

乾元真歇數約他日同庵居

與君俱自走天涯
何處雲山不是家
城市少留真夢事
林泉高卧亦空花
久無佳句彫肝腎
漫有微言到齒牙
他日一庵如可必
願分齋罷半甌茶

將發福唐

一云別李叔易謙簡士珪

盡此一囊粟我行當有期
涼風吹天涯增我別後思
結

束向行在問子還一作來何時初無濟時策處事多參差

環視中所有無一施可宜形骸久已病敢徼當世知不
蒙朋友責定遭兒輩喧矧此世外人勸歸常恐遲相尋
有如日請盟吾此詩

聽雨

日數歸期似有期故園無語說相思芭蕉葉上三更雨
正是愁人睡覺時

茉莉

香如含笑全然勝
韻比酴醿更似高
所恨海濱出太遠
初無名字入風騷

聞二弟召對

晚來忽雨已如秋
竹枕欹眠得自由
忽報諸郎例升進
頗容老子便歸休
人傳幽并三年旱
勢合山河一戰收
顧我迂疎最宜病
祇應隨處見菟裘

夜涼早起尋李貽季陸慶長所患詩有作

夜長忘陰晴忽聽簷雨滴空房
閉重門涼氣通枕席欣

然欲攬被如覓舊相識那知庚伏內得此睡通夕起尋
兩君詩令我生氣力成蹊長桃李已自除荆棘遠游得
數士舍此百無益挑燈視皮膚不顧蚊齕赤因之不復
寐為子增嘆息

聞大倫與三曾二范聚學并寄夏三十一四首

我思臨川居欲往意未慊每懷三二子歲月多荏苒後
生慎所習正是絲在染未須極軒昂且須就收斂舉動
思故人此志豈不遠才雖有高下事亦要強勉願為江

海深莫作盆盞淺

世人爭錙銖未語色已變居然面頸赤自處亦已賤寧
知烈士胸渠自有志願一介不妄取萬鍾我亦倦古人
有伯夷名冠太史傳

見人輒有求所以百慮非但能守簞瓢何事不可為愚
夫飽欲死志士固長饑出門萬里塗其亦慎所之

莫惜一日勤而忘終身憂農夫力耕作其必歲有秋日
前不鹵莽久亦有倍收少年不努力老大復何求

別法一上人

我有江浙役子能乘興來便同湯院浴却為故人回此
道恐遂絕後生良可哀試尋鑰匙子一一與重開

別後寄珪粹中

一作鼓山

海上相逢兩過秋飄然乘興亦悠悠送行百里還歸去
同是江湖不繫舟

哭王元邁

紛紛舉手爭毫末砥柱當河獨不流一夕便隨波浪沒

天涯黃葉更悲秋

別林氏兄弟

二年住閩嶺所閱足青紫那知萬衆中得此數君子相
從不我厭但覺歲月駛高論脫時俗如風灌煩暑出處
雖未同氣味固相似人生有離合一作低昂所畏為物使要
當吸英華不必計渣滓他年肯相尋在彼不在此

本中欲謀他日復來福唐之東山林少穎請作詩
以記因成兩絕

老大馳驅百不宜
敢將筋力蹈危機
他年更欲眠雲住
同過東山嘗荔枝

更作東山住尋盟
尚有詩看君騰踏去
及我未歸時

謝人惠陳家紫

煩君惠我陳家紫
萬里漂流合得嘗
莫道聞名不相識
舊隨籩實到吾鄉

閒居感舊偶成十絕乘興有作不復詮次

四海交遊一信民後來
情分更誰親可憐相伴谿堂老

一去塵寰三十春

汪信民謝無逸

一世聲名高與闕亦知不合住人間不令整頓乾坤了

虛逐松聲半夜還

高茂華秀實闕治沚叙

璧老投冠去學禪堂堂一一作三鼓陣無前平生老伴唯

均父馬病塗窮不著鞭

饒節德操夏倪均父

屏醫郤藥病良已絕學捐書我又休却到舊時行履處

五湖烟水上漁舟

萬里飄然不繫舟老來專憶舊交游西風日落中原路

虛度江湖數十秋

唐子直心絕可憐夏侯苦節更誰傳諸昆事業風流在
各有殘詩十數篇

唐廣仁充之夏侯髦節夫昆載之伯禹詠之之道貫之季一謂之季此冲

之叔

平生親愛獨諸昆叔也相親共寂寥半日不來須折簡
暫時相遠定相招

叔用

病夫長病合長饑豈復輕隨世上兒雲雨覆翻渠有分
江湖潦倒我無知

曾郎學行冠姻親趙子才能又絕倫仲弟故應同二妙

一時先後委埃塵

曾元似趙才仲及余仲弟也

便欲長休老未能爾來頻愧住庵僧直須棄盡人間事

始見從來一點燈

溫泉

一作福州湯院

海上秋來早晚涼客愁蘇醒似還鄉歸途尚欲療瘡疥

剩乞溫泉一勺湯

將去福州

委曲隨人久未甘翛然午枕睡方酣功名到此終無分
身世從來百不堪為已工夫今粗曉住山活計久相諳
他時不用求三徑投老才須住一庵

初秋

涼風驚木葉意欲作深秋客病渾如昨囊空却自由因
閒得飲酒端坐勝封侯寄語平生友當能為我謀

奉呈鼓山雲門二老

汝水相逢今幾年只今同住海南偏月明本自無虧缺

山色何嘗有變遷他日會逢舅舅語一時驚散老狐禪
倘因居士閒開口却作冲和二月天

從叔翼叔覓茶

疾病侵凌轉不堪時思一室奉清談嗣宗已餉兵厨酒
當有新茶惠阿咸

福建界首寄福州親舊

海上秋風吹客衣屢煩親舊送將歸今朝更入江東路
便恐書來即漸稀

嚴州九日坐上贈胡明仲常子正

今年得交舊
九日會嚴州
城角風雲暮
天涯景色秋
功名有長鋏
行李付扁舟
苦恨三年別
聊因一笑留
病添文字
嬾老恥稻梁
謀活國須公等
吾生便可休

方允迪挽詞二首

已矣儒林老
今為地下郎
空山留几杖
遺稿漫文章
徑狹風霜遠
溪深草木長
傷心釣臺路
千載闕幽光
惟君好兄弟
少小共聲名
豈止千人傑
俱為一代英
云

何卧丘壑不使至公卿慟哭松風遠悲雲咽莫聲

程伯禹母夫人挽詩二首

久矣閨門秀端如玉在淵相夫成令德教子作名賢遽逐秋風盡空令莫景遷傷心江左地松柏閉新阡

舊隨賢子後每得熟嚴規未獲升堂拜空成相挽詩濶頻賜湯沐壽不到期頤他日家聲在流傳世未知

送范師厚宣諭四川

老境侵尋久廢詩送君寧復似當時虺隕病馬猶長路

偃蹇寒松只舊枝想得山川瞻使節便令父老識家規
忠宣公嘗使成都

聖朝本意惟寬大網漏吞舟始合宜

王導嘗遣八部

從事之部顧和在下傳還從事見導人人各言二千石長短和獨無言導問之和曰明公為政當使網漏吞舟之魚豈可採聽風聞察

贈了老

前年見公滄海上法會堂堂萬騎將今年見公浙河東
猶是當時舊老翁送行更有天童老駢驥脊驅獵霜草
野狐射干膽欲破不但獨噴羣馬倒我哀且病百念絕

使得從公不為早忘情遁跡亦未是言與不言俱一掃
世人擾擾不歸家公行問渠有何好

東萊詩集卷十五

欽定四庫全書

東萊詩集卷十六

宋呂本中撰

送楊晨當時赴夔漕

楊侯從舊名籍籍吳中一見如舊識憐我衰頹病已侵
怪我辛勤百無益今君遽作巴蜀行江頭宿昔春水生
路經三峽不艱阻遍與疲民間疾苦隨身長劒莫輕舞
試伐蛟鼉斬豺虎此來人士衆如雨得君此行慰羈旅
君但垂情一笑許勝使區區入州府百城因之遂安堵

亦勝無事閒坐否

送徐林稚山赴江西漕

總角相從四十年如今衰病已華顛已一作各久無耆老可

訪事尚喜交游不乏賢未使從容持從橐却令辛苦上
江船百城編戶皆疲瘵日望公來與息肩

將發金陵奉懷張彥實

老矣君何往翩然我欲歸文章晚未用歲月事多違江
接鄱陽路風吹游子衣不應蘧伯玉獨悟昔年非

初離建康

一云鍾山寄范十四弟諸人

嘗憶他年出舊京
汴堤榆柳與船平
寧知此日鍾山路
亦是東行第一程

紛紛車馬未言還
我獨支離便得閒
尚有同門二三子
肯同今夜宿鍾山

寓會稽禹迹寺

陰雨靜不出端居
還自由客來從短褐
天氣已深秋所在
兵猶鬪中原亂不休
廟堂如有意便與萬人謀

會稽初秋四首

今來留滯浙河東想見閩山荔枝紅雖有故人家在彼
可無方便託西風

張侯問舍復何時我亦留連去未期便欲為君草堂客
幾時先寄落成詩

故園回首但斜陽所至奔波避賊忙天下何曾有定處
越南燕北是中央

病來每有居山興老去初無住世心三尺枯桐無舊譜

始知三歎有遺音

錢遜叔侍郎奉京師舊墳改葬天柱謹成挽詩一

首

錢氏霸吳越功德在斯民遜王早退居身退道益尊至
今二百年盛事傳後昆文采震本朝豈惟光一門後來
翰林公又以直聲聞累葉其外家家世悉殊勲善惡久
乃效其報于此分裔孫傑立者迎喪自中原遂令擾攘
後得安久旅魂依依天柱山不必京洛塵死者如有知

當言吾有孫小人託末契所恨老不文賜此一時盛忍
終無一言越水流不竭越山旱不昏孝子亦不匱錫類
到初雲

重陽日西興寄臨安親舊

我來西興日君在龍山旁如何阻一水不共作重陽別
浦潮猶白深秋菊未黃遙知對杯酌不記是他鄉

范伯言藥隱

一云送范彥西行歸西山

烈士故徇名中民但榮官寧知陋巷士堅坐有餘歡出

從聖師游歸坐守一簾出門視天壤密邇心自寬范侯
嬾仕宦決意歸西山西山有藥隱此地可盤桓誓將從
古人上追孔與顏有田可以耕有屋可以安寧能伴兒
曹日夜不得閒我亦倦游者世味更百難夢寐想君家
父子兄弟間便當卜隣居一生長往還相依得情話出
語清肺肝後生有郢質更為斲其漫君行問安否此盟
當未寒

題趙祖文盤谷圖

趙郎落筆寫盤谷，正是太平無事時。
今日太行那有此，滿山樵採盡癡兒。

送胡明仲知永州

君行西游浮沅湘，洞庭岳麓天一方。
岳前老人望君久，歲晚不嫌歸路長。
晴天萬里去鴻鵠，韞玉未售猶深藏。
遠行固是君素願，多蓄奇謀羞自獻。
後生紛紛了目前，大策定非凡所見。
簿書汨沒渠自忙，道里嶮巇我不倦。
百州東下例無澗，要君嶷然如斷山。
原缺我老無用逢多。

六字

契間胸次倡塞

原缺一字

未寬日夜矯首須

原缺三字

汴

原缺一字

風君不難不使量炎漫

原缺一字端

孫首之短堂

孫郎囊空意且滿因謂身長才則短以短名堂堂未成
長短是非俱不管嚴州一見鬢倉浪贈我新詩如夜光
何時到君短堂上更話如今歸興長

贈孫首之

予窮非一辟丹塵固長久自從太平時以至戎事後今

茲益窮蹇所至但縮手遂令甑生塵不止襟見肘未能
脫身去且作避地走金盤貯火齊熟視不敢取溪船一
濤江亦未遮南斗固知松栢生必不在培塿見我嚴州
城世事嬾到口念子抱奇才有節空原缺二字簞瓢在陋巷
世亦如此不垂離勿重言悲甚且飲酒

朱成伯秀野堂

客愁固多岐我懷亦蕭散連年尋故人見子二水岸官
居少閒暇歲月忽已換有堂名秀野未入俗眼看得名

自君子可當清淨觀未能藝桃李且自飽藜覓荒涼城
一隅初不越門限脫身少年場念此已熟爛嗟子老病
侵閱世蓋多難相逢默無語自足洗憂患窮冬足雨雪
近市乏薪炭時來正堂堂尚得一笑粲

次秀亭韻二首

忽見新亭起廢基暮雲疎雨兩霏霏憑欄一望長江遠
鑿石新開小徑微治世從今可招隱至人何苦更藏輝
使君不厭賓朋集正為飄流到眼稀

舟車來往閭回環今日陪公得暫閒漸喜著身人迹外
勝如隨衆馬蹄間紫紆細數溪頭路蒼翠遙看雨後山正
恐朝廷須舊物不容常此面辱顏

甘棠樓

高樓面面好舉目是溪山急水瀉湍瀨諸峰玉髻鬟聊
為半日出得伴使君閒作者風流在承平氣象還身雖
住世網心已離塵寰未厭陪游數唯愁覓句慳高風雖
在望逸韻恐難攀咫尺蓬萊路惟公指顧間

師奴病化二首

伴我閒中氣味長
竹輿游歷徧諸方
火邊每與人爭席
睡起偏嫌犬吠床
能與兒童較幾許
賢子臧獲便相忘
他生尚欲隨吾在
要奉香爐漉水囊

受戒不捕鼠聽經
如欲膺誰知兩溪畔
今日送亡僧

舟行至桐廬

乘舟待潮發一日到桐廬
物色寒初甚溪山畫不如
往來真是夢親舊不須書
猶贊鷁夷在時容託後車

示兒

忍窮吾有味雕句汝無功客舍鶯塵裏春隨浩蕩中初
無買山費真與住庵同更想顏氏宅簞瓢亦屢空

陳朝奉坐化

東風吹雨欲翻盆杏樹前頭柳暗村試問老人何處去
夜來新月又黃昏

嚴州春晚二首

居閒病常搜出郭春已老微雨淨新綠轉覺原野好故

人各漂散頗恨來不早尚有壁間詩猶堪寫懷抱

是月足陰晦暮春常苦寒閉門猶疾病春物豈相干堅

坐客已少長貧心自安幽蘭有花在尚肯結餘歡

予將為三衢之行下塔僧惠道求詩留題因成絕

句遺之

欲過城東病不能飛簷高棟想層層半年夢作嚴州住

一首詩留塔下僧

將適三衢而七弟欲往臨安臨行作詩奉送

弟要題詩別人還勸我留如何南去路更送北行舟處
事須遠畧擇交當廣求秋風理歸棹為我上衢州

椿閣二首

往時椿閣老盛德傳鄉閭至今風流在遺芳殊未疎
有孫仁者靜遠近伏共賢定知建德民祝令如翁年

弋陽魏令賞音亭

高亭已寂寞山水自清音主人去已久此意誰復尋夢
回還舊觀川上有微吟于焉繼前作因見平生心

建安熊述之為令建德不言而民治將適三衢留

詩美之二首

熊卿治建德隱几心若水民肥吏乾枯亦不用笞箠問
子何能然此豈力可使建安今多賢于子可見爾

建安固多賢故人劉與胡山川古秀潤珠生崖不枯我
病日已懶觸事見迂疎行當脫身去一塵從子居

擬古樂府

高堂陳八音同聽不同樂狂飈送鴻鵠萬里翔寥廓一

去三十年事事非前約當時綠綺琴塵埃無處著時節
非不久此意但如昨

己未重陽

病無佳思只深藏漫遶東籬菊未黃最是一年秋好處
可能無酒過重陽

李城拙軒

念彼巧者勞知此拙者安拙者固無營一生長得閒子
豈真拙者託此以自安何嘗曳長裾顧肯卑小官世人

極變態翻手覆手間子獨如不聞默坐安如山九衢走
紅塵百事不相干我老始見子古井久不瀾贈子拙軒
詩留子靜處看當蒙一笑許敢言愁肺肝

清慎軒

清慎軒中一事無午窓高枕似吾廬世人稱意何須道
乃祖風流正不疎

將往城南觀音寺阻雨未果

野寺他年別溪山浪作秋初涼頗宜出小雨故妨游僧

老渾無念田荒近不收猶思五更懺清切勝蠻謳

余迪漫浪齋

顏子在陋巷無一當其心日惟聖之學正自惜分陰子
生千載後此意尚能尋齋雖名漫浪跡豈計浮沉文字
浩今古不受俗務侵端如貯美酒妙處當自斟臨卷忽
有得如來君義臨即此是聖域子行無滯淫

無題四首

我病無能到處窮子才安得尚漂蓬如何共飲重陽酒

相對無言似乃翁

重陽共採東籬菊
却似乃翁年少時
顧我無能甘老病
相尋唯有向來詩

聞鐘即起待天明
客舍無聊坐五更
何日長風破巨浪
看渠萬里出門行

平生飽我飯
脫粟靜夜不眠尋
細書可見烏衣
諸子弟從來志業
不如渠

邊愁二首

牧人吹短笛一半是離聲想得南飛鳥雲間亦厭聽
秋聲晚來急邊塞乍寒時不似江南日愁多只自知

招范四弟

涼風忽滿簾江漢有歸心顧我病如昨憐君窮至今苦
嫌歸夢短不厭酒杯深試問玉川老何時許降臨

衢州路中

今日衢州路師奴不共行阿童渾似汝只是太麤生

憶福州舊居菊花

問訊墻前菊如今屬阿誰祇應風露底猶記摘殘枝

求趙表之墨

超然堂中墨如戟支撑宗門渠有力叅得諸方一味禪
以此示人人不識病夫見之喜折屐便欲投詩恐無益
主人不吝是家風會見琅琅送珪璧

陋巵

陋巵客自稀短日寒未到感君時一來得以慰懷抱論
文有根柢落筆清且與如歌五絃琴促轉有餘操黃花

開正繁薄酒可相勞請君尋此盟妙處同一造

示聞生

形容落魄猶須酒疾病因尋久廢詩忽見聞郎七字句
却如王謝少年時

簡何居厚

我乏濟勝具子懷經世才寒窓得一笑陋巷絕纖埃白
酒難充醉黃花只強開更憐無事日時有好詩來

謝人送酒

他鄉逢故人已覺意氣盛得君雙榼酒起我終日病清
如兩龔潔氣出徐邈聖乃知無功鄉飲往有捷徑一盃
我已足不必待厯聘扁舟下東陽此計或未定尚欲尋
舊盟短拙恐未稱先生肯降臨時掃一室淨

東萊詩集卷十六